

ING FATUM ta tene mini congreso tocante relacion Compania di Aseguro y Gobierno



ORANJESTAD(AAN): -- Na ocasion di su cincuenta aña di existencia, ING Fatum a tene un lunch di negoshi y un congreso mini na Sonesta Hotel.

Na e ocasion festivo aki a hiba palabra Peter Hendriks, voorzitter di Consoho di Directornan di ING Fatum, Hans du Marchie Sarvaas, presidente di Banco Central di Aruba, Herman Touw, general manager di ING

Financial Services International y Willem Zevenijn, general manager di ING Fatum.

Gran cantidad di invitado tabata presente na e lunch, entre nan representantenan di gobierno, di sector bancario y di sector priva y tambe di sindicatonan.

Den su speech, señor Du Marchie Sarvaas a remarca cu e presencia di cincuenta aña di ING

Fatum na Aruba ta ilustra e compromiso riba termino largo cu e compania tin cu comunidad di Aruba.

Segun director di Banco Central, e compromiso aki ta di gran importancia pa desaroyo di industria di seguro na Aruba.

Riba fotonan hunto cu articulo, un impresion di e lunch y congreso mini di ayera.

Mester diseñá henter sistema di Aseguro Social di nobo

ORANJESTAD(AAN): -- ING Fatum a tene un lunch festivo ayera, na ocasion di su cincuenta aña di existencia.

Esaki a tuma lugar na Sonesta Hotel, den presencia di funcionarionan halto di ING Fatum na Aruba y Antiyas Hulandes y di ING Groep na Hulanda.

Despues di e lunch, a sigui un congreso mini cu a hiba como titulo "Cooperacion entre Gobierno y Companianan di Aseguro".

Oradornan na e congreso aki tabata presidente di Banco Central di Aruba Hans du Marchie Sarvaas y representante di Junta Ehecutivo di Grupo ING na Hulanda Herman Touw.

Señor Sarvaas a papia en cuanto e papel cu Banco Central ta hunga como organo cu ta supervisa companianan di seguro.

Señor Touw a papia tocante cuanto gobierno, companianan di seguro, dunadornan di trabao y empleadonan por beneficia di coopera cu otro.

Den su speech, voorzitter di Consoho di Directornan di ING Fatum Peter Hendriks a bisa cu su empresa ta no solamente e compania di seguro di mas grandi na Aruba pero tambe un di e inversionistanan di mas grandi.

Te awor, ING Fatum a inverti 150 milyon Florin na Aruba, di cual 50% den fianzanan gubernamental.

Cu e interes financiero di Aruba den mente, ING Fatum ta haya cu e mester tene vista skerpi riba cu economia nacional ta desaroyando su mes.

Tambe cu e tin cu yuda pa mehora asunto, unda cu ta posible.

Segun señor Hendriks, seguro social ta un area particular caminda yudanza di ING Fatum ta rekeri.

E ta mira cu mescos cu varios otro pais, Aruba ta luchando cu kico dicidi pa cu seguro social.

Den opinion di señor Hendriks, e experiencia y conocimiento di ING Fatum por yuda Aruba pa topa cu su retonan riba e tereno aki.

E ta splica cu e principianan di seguro ta e pilarnan di cualkier sistema di seguridad social na mundo y ta conseha gobierno pa duna e companianan di seguro oportunidad pa nan haci loke nan ta haci mihor.

Esta, pa asegura esnan cu ta den necesidad di cualkier forma di seguridad na un manera cu ta eficiente y efectivo y cu ta na un nivel sustenible y benéfico pa tur partido involvi.

Na man di e analisis di Consoho Social-Economico (SER),

señor Hendriks a ilustra su punto.

Recientemente, SER a bisa cu Aruba lo cuminsa encontra dificultadnan structural den su sistema di seguridad social pronto.

E estudio di SER ta muestra cu e sistema di seguridad social ta un peso demasiado grandi riba economia di Aruba.

Esaki no solamente pasobra crecimiento economico ta bahando pero tambe pa motibo cu e benificionan social ta extremadamente generoso, sigur compara cu otro paisnan.

Por ehempel, Arubianonan ta bay cu pensioen cu 60 aña, Hulandesnan no ta retira prome cu 65 aña, e pensioen pa pareha na Aruba ta supera salario minimo cu 40%, e pensioen na Hulanda ta 70% di salario minimo.

Segun voorzitter di Consoho di Directornan Hendriks, e problema cu esaki ta e peso di belasting cu cual e pensioennan ta wordo financia.

Como consecuencia di un ke otro, e diferencia entre entrada bruto y neto (entre loke ta para riba loonstrookje y loke hende ta bay cas cu ne) a hancha bastante durante añanan.

Pa un trahador cu ta gana 1530 Florin pa luna por ehempel, e diferencia aki a subi di 23% na 1990 pa 29% na 1998.

E plannan pa Aseguro General Medico (AZV) lo probablemente hisa e percentage pa riba 40% na aña 2002.

Riba e 40% aki, introduccion di Aseguro General di Pensioen (APV) lo pone 5% loke lo hisa e total pa 45%.

Esaki kier meen cu di e trahador cu ta gana 1530 Florin pa luna na aña 2002, lo kita casi 700 Florin na belasting.

Den opinion di señor Hendriks, no ta difícil pa compronde cu e desaroyo aki lo tin un efecto dramático riba salarionan y lo haci cu negoshinan chikito y mediano lo bay failliet.

Esaki na su turno, lo hisa e peso riba gobierno mas ainda y lo forza Aruba den un spiraal negativo.

Pa preveni cu e situacion aki bira realidad, ta importante pa "rethink" henter e sistema di seguro social loke ta hustamente unda e companianan di seguro cu nan experiencia y conocimiento lo mester haya oportunidad pa drenta.

Participacion di companianan di seguro den e sistema di seguro social ta un trend mundial cu ta scapa gobierno cantidadnan enorme di placa.

Ademas, e lo baha gastonan di labor y lo haci empresanan y economanan mas competitivo riba mercado internacional.